

Bases reguladoras para a concesión de axudas da Deputación de Pontevedra ao deporte de alto nivel e ao talento deportivo da provincia no ano 2026 vinculadas ao recoñecemento das categorías provinciais DEPO_DAN, DEPO_DAN+ e DEPO_TALENTO

O deporte constitúe unha actividade de interese público polo seu impacto na saúde, na educación, na cohesión social, na igualdade de oportunidades e na transmisión de valores individuais e colectivos. Dentro desta realidade, o deporte de alto nivel e o talento deportivo representan unha expresión especialmente cualificada do esforzo, da disciplina, da constancia, da superación persoal e da excelencia, ao tempo que contribúen a proxectar a provincia de Pontevedra no ámbito deportivo autonómico, estatal e internacional.

O alto nivel deportivo comporta elevadas cotas de exixencia non só no plano estritamente deportivo, senón tamén nos ámbitos familiar, formativo, laboral, económico e social. A preparación continuada, os adestramentos, as concentracións, as competicións, os desprazamentos e a necesidade de dispoñer de medios técnicos e materiais adecuados supoñen unha dedicación intensa que, en moitas ocasións, dificulta a compatibilización da práctica competitiva co desenvolvemento do resto dos planos vitais das persoas vinculadas ao sistema deportivo.

Neste contexto, os poderes públicos deben articular medidas de apoio que permitan acompañar nas distintas etapas do progreso deportivo, desde os primeiros momentos de detección e consolidación do talento ata o máximo rendemento competitivo, sen esquecer a atención necesaria ás transicións persoais, académicas, profesionais e deportivas. Estas medidas deben ser proporcionadas ás necesidades propias de cada idade, modalidade, nivel de exixencia e momento da traxectoria deportiva.

A Deputación de Pontevedra, no marco da súa estratexia provincial vinculada á **provincia do deporte**, ten como obxectivo recoñecer e apoiar o labor das persoas deportistas que acadan resultados destacados, así como daquelas que se atopan nunha etapa de especial proxección e desenvolvemento. Así mesmo, considera necesario poñer en valor o traballo das adestradoras e adestradores, das xuízas e xuíces, e das árbitras e árbitros, cuxa dedicación técnica, formativa, organizativa e de garantía da competición resulta imprescindible para o desenvolvemento do deporte de alto nivel e para a consolidación dun sistema deportivo provincial máis sólido, inclusivo e competitivo.



A través desta liña de actuación, a Deputación de Pontevedra continúa apoiando o deporte de alto nivel e o talento deportivo da provincia, reforzando unha política pública orientada a evitar que as dificultades económicas, materiais ou organizativas poidan constituír unha barreira para a progresión deportiva. Con este obxectivo, estas bases regulan a concesión de axudas vinculadas ao recoñecemento das categorías provinciais **DEPO_DAN**, **DEPO_DAN+** e **DEPO_TALENTO**, destinadas ás persoas que cumpran os requisitos previstos nelas.

Desde o punto de vista competencial, esta actuación enmárcase no exercicio das competencias da Deputación de Pontevedra en materia de cooperación, asistencia e promoción de actividades de interese provincial, así como no apoio ás persoas e entidades que contribúen ao desenvolvemento deportivo da provincia. Así mesmo, resulta coherente co marco normativo vixente en materia deportiva, no que se recoñece a relevancia do deporte de alto nivel, do deporte de rendemento e da promoción da práctica deportiva como ámbitos de interese público.

En particular, na Lei 39/2022, de 30 de decembro, do deporte, recoñécese a importancia do deporte de alto nivel e promóvese o seu fomento, así como a participación das e dos deportistas, clubs, profesionais da arbitrase e do adestramento, persoal técnico deportivo e demais axentes do sistema deportivo nas competicións deportivas. Pola súa banda, na Lei 3/2012, de 2 de abril, do deporte de Galicia, recóllese entre os seus principios xerais a promoción do deporte de competición e de alto nivel. Así mesmo, no Decreto 165/2020, de 17 de setembro, polo que se regula o deporte de alto nivel, de alto rendemento e de rendemento deportivo de base de Galicia, ponse de manifesto a necesidade de articular medidas que faciliten a compatibilidade da preparación e da competición deportiva co desenvolvemento integral das persoas vinculadas ao alto nivel deportivo.

Por todo o anterior, a Deputación de Pontevedra convoca no ano 2026 estas axudas destinadas a apoiar o deporte de alto nivel e o talento deportivo da provincia, vinculadas ao recoñecemento das categorías provinciais DEPO_DAN, DEPO_DAN+ e DEPO_TALENTO, ao abeiro do establecido na Lei 38/2003, de 17 de novembro, xeral de subvencións (LXS), na Lei 39/2015, de 1 de outubro, do procedemento administrativo común das administracións públicas (LPACAP), na Ordenanza reguladora de subvencións da Deputación de Pontevedra e na demais normativa aplicable, de acordo coas seguintes



BASES

Primeira. Obxecto

Estas bases teñen por obxecto regular, no ano 2026, a concesión das axudas da Deputación de Pontevedra destinadas a apoiar o deporte de alto nivel e o talento deportivo da provincia, vinculadas ao recoñecemento da categoría deportiva provincial DEPO_DAN, DEPO_DAN+ ou DEPO_TALENTO.

As axudas reguladas nestas bases teñen como finalidade contribuír á preparación, progresión, participación competitiva e desenvolvemento técnico das persoas beneficiarias, no marco da estratexia provincial da Deputación de Pontevedra vinculada á provincia do deporte.

Segunda. Persoas beneficiarias

Poderán beneficiarse das axudas reguladas nestas bases as persoas físicas nadas na provincia de Pontevedra ou empadroadas nela, polo menos, desde o 1 de xaneiro de 2025, que acrediten os resultados deportivos e as demais condicións esixidas nestas bases para acceder ás axudas vinculadas ás categorías provinciais DEPO_DAN, DEPO_DAN+ ou DEPO_TALENTO da Deputación de Pontevedra no ano 2026, de acordo cos requisitos específicos que se indican a continuación:

I. DEPO_DAN e DEPO_DAN+

Para acceder ás categorías provinciais DEPO_DAN e DEPO_DAN+, as persoas solicitantes deberán cumprir os seguintes requisitos:

- a) Estar recoñecidas coa condición de alto nivel de Galicia, no caso de deportistas, técnicas e técnicos, adestradoras e adestradores, xuízas e xuíces, e árbitras e árbitros, de conformidade co Decreto 165/2020, de 17 de setembro, ou coa condición de deportista de alto nivel do Estado no momento da presentación da solicitude.



- b) Estar en posesión dunha licenza deportiva vixente expedida por unha federación deportiva, na condición de deportista, adestradora ou adestrador, xuíza ou xuíz, árbitra ou árbitro, segundo corresponda.
- c) Non estar a cumprir, no momento da presentación da solicitude, ningunha sanción disciplinaria deportiva ou administrativa firme pola comisión dunha infracción de carácter grave ou moi grave, ou por dopaxe.

II. DEPO_TALENTO

Para acceder á categoría provincial DEPO_TALENTO, as persoas solicitantes deberán cumprir os seguintes requisitos:

- a) Nacer entre o 1 de xaneiro de 2009 e o 31 de decembro de 2014, ambos incluídos.
- b) A condición da categoría DEPO_TALENTO poderá recoñecérselles só ás e aos deportistas.
- c) Estar en posesión dunha licenza deportiva vixente expedida por unha federación deportiva, na condición de deportista, segundo corresponda.
- d) Acreditar que no ano 2025 acadaron un dos tres primeiros postos nun campionato de España ou participaron nun campionato de Europa ou do mundo nos termos establecidos nestas bases.
- e) Non estar a cumprir, no momento da presentación da solicitude, ningunha sanción disciplinaria deportiva ou administrativa firme pola comisión dunha infracción de carácter grave ou moi grave, ou por dopaxe.

Non poderán obter a condición de beneficiarias aquelas persoas nas que conorra algunha das circunstancias previstas no artigo 13 da LXS.

As persoas solicitantes declararán, coa presentación da solicitude, estar ao corrente no cumprimento das obrigas tributarias coa Axencia Estatal de Administración Tributaria (AEAT), coa Axencia Tributaria de Galicia (ATRIGA), coa Seguridade Social e coa Deputación de Pontevedra, sen prexuízo das comprobacións que poida realizar a Deputación.



Terceira. Financiamento

A contía total destinada a estas axudas estará suxeita á dispoñibilidade orzamentaria e convocarase con cargo á aplicación 26/340.3400.481.01 do Orzamento da Deputación para o ano 2026 por un importe total de cincocentos mil euros (500.000 €).

Esta cantidade poderase incrementar nun máximo dun 25 % do importe total, de acordo coas circunstancias previstas no artigo 58.2 do Regulamento da LXS, aprobado polo Real decreto 887/2006, de 21 de xullo, e no artigo 31 da Lei 9/2007, de 13 de xuño, de subvencións de Galicia (LSG).

O importe deste aumento dependerá dunha xeración, ampliación ou incorporación de crédito. A efectividade da contía adicional queda condicionada á declaración de dispoñibilidade do crédito como consecuencia das circunstancias antes sinaladas e, no seu caso, logo da aprobación da modificación orzamentaria que proceda, nun momento anterior á resolución da concesión da subvención. Este incremento deberá publicarse antes da resolución de concesión nos mesmos medios que a convocatoria e indicaranse o crédito final dispoñible e a distribución definitiva. Este anuncio non implicará a apertura de prazo para presentar novas solicitudes nin o inicio dun novo cómputo de prazo para resolver.

De ningún modo a suma total das axudas concedidas poderá superar o orzamento máximo previsto nestas bases ou, de ser o caso, nas súas posibles modificacións.

Cuarta. Réxime xurídico

As subvencións reguladas nestas bases tramitaranse en réxime de concorrencia non competitiva, ao non resultar necesarias a comparación nin a prelación das solicitudes presentadas. A concesión efectuarase mediante a comprobación do cumprimento dos requisitos establecidos nestas bases e a asignación da axuda que corresponda en función dos resultados deportivos acreditados, co límite do crédito dispoñible.

O procedemento respectará os principios de publicidade, transparencia, obxectividade, igualdade e non discriminación, eficacia no cumprimento dos obxectivos fixados e eficiencia na asignación e utilización dos recursos públicos.



O procedemento rexeráse por estas bases; pola LXS; pola LSG; pola Ordenanza xeral de subvencións da Deputación de Pontevedra vixente; e pola normativa xeral de procedemento administrativo común e de réxime xurídico do sector público.

Así mesmo, no relativo á ordenación da actividade físico-deportiva, ao deporte de alto nivel, ao alto rendemento deportivo, ao rendemento deportivo de base e ao réxime das entidades e axentes deportivos, será de aplicación a normativa deportiva estatal e autonómica vixente, así como as disposicións regulamentarias e demais normas de desenvolvemento que resulten pertinentes.

En todo o non previsto nas normas anteriores, aplicaranse de forma supletoria as restantes disposicións do ordenamento xurídico que resulten pertinentes.

Quinta. Tipos de axuda

As axudas reguladas nesta base concédense no ano 2026 en atención aos méritos deportivos acreditados polas persoas solicitantes durante o ano 2025, como ano inmediatamente anterior ao da convocatoria.

Establécense os seguintes tipos e contías de axuda:

I. Grupo A. Axudas vinculadas á categoría provincial DEPO_DAN

Axudas	Importe	Mérito deportivo acreditado
A1	2.400 €	<ul style="list-style-type: none">Para deportistas: 1.º, 2.º ou 3.º posto no campionato do mundo.Para técnicas/os ou adestradoras/es: resultado equivalente acadado pola persoa deportista ou equipo adestrado.Para xuízas/xuíces ou árbitras/os: designación e participación oficial na final, partido final, proba final ou fase decisiva equivalente dun campionato do mundo.
A2	1.500 €	<ul style="list-style-type: none">Para deportistas: do 4.º posto en diante no campionato do mundo ou 1.º, 2.º ou 3.º posto no campionato de Europa.Para técnicas/os ou adestradoras/es: resultado equivalente acadado pola persoa deportista ou equipo adestrado.



		<ul style="list-style-type: none"> Para xuízas/xuíces ou árbitras/os: designación e participación oficial nun campionato do mundo, ou na final, partido final, proba final ou fase decisiva equivalente dun campionato de Europa.
A3	1.080 €	<ul style="list-style-type: none"> Para deportistas: do 4.º posto en diante no campionato de Europa ou 1.º, 2.º ou 3.º posto no campionato de España. Para técnicas/os ou adestradoras/es: resultado equivalente acadado pola persoa deportista ou equipo adestrado. Para xuízas/xuíces ou árbitras/os: designación e participación oficial nun campionato de Europa, ou na final, partido final, proba final ou fase decisiva equivalente dun campionato de España.
A4	600 €	<ul style="list-style-type: none"> Para deportistas: do 4.º posto en diante no campionato de España ou 1.º, 2.º ou 3.º posto no campionato galego. Para técnicas/os ou adestradoras/es: resultado equivalente acadado pola persoa deportista ou equipo adestrado. Para xuízas/xuíces ou árbitras/os: designación e participación oficial nun campionato de España, ou na final, partido final, proba final ou fase decisiva equivalente dun campionato galego.

II. Grupo A+: Axudas para persoas con discapacidade física, intelectual ou visual vinculadas á categoría provincial DEPO_DAN+

Axudas	Importe	Mérito deportivo acreditado
A+1	3.300 €	<ul style="list-style-type: none"> Para deportistas: 1.º, 2.º ou 3.º posto no campionato do mundo. Para técnicas/os ou adestradoras/es: resultado equivalente acadado pola persoa deportista ou equipo adestrado. Para xuízas/xuíces ou árbitras/os: designación e participación oficial na final, partido final, proba final ou fase decisiva equivalente dun campionato do mundo.
A+2	2.200 €	<ul style="list-style-type: none"> Para deportistas: do 4.º posto en diante no campionato do mundo ou 1.º, 2.º ou 3.º posto no campionato de Europa. Para técnicas/os ou adestradoras/es: resultado equivalente acadado pola persoa deportista ou equipo adestrado. Para xuízas/xuíces ou árbitras/os: designación e participación oficial nun campionato do mundo, ou na final, partido final, proba final ou fase decisiva equivalente dun campionato de Europa.



A+3	1.650 €	<ul style="list-style-type: none"> ▪ Para deportistas: do 4.º posto en diante no campionato de Europa ou 1.º, 2.º ou 3.º posto no campionato de España. ▪ Para técnicas/os ou adestradoras/es: resultado equivalente acadado pola persoa deportista ou equipo adestrado.
		<ul style="list-style-type: none"> ▪ Para xuízas/xuíces ou árbitras/os: designación e participación oficial nun campionato de Europa, ou na final, partido final, proba final ou fase decisiva equivalente dun campionato de España.
A+4	1.100 €	<ul style="list-style-type: none"> ▪ Para deportistas: do 4.º posto en diante no campionato de España ou 1.º, 2.º ou 3.º posto no campionato galego. ▪ Para técnicas/os ou adestradoras/es: resultado equivalente acadado pola persoa deportista ou equipo adestrado. ▪ Para xuízas/xuíces ou árbitras/os: designación e participación oficial nun campionato de España, ou na final, partido final, proba final ou fase decisiva equivalente dun campionato galego.

III. Grupo B: Axudas vinculadas á categoría provincial DEPO_TALENTO

Axudas	Importe	Mérito deportivo acreditado
B1	1.380 €	<ul style="list-style-type: none"> ▪ Para deportistas: 1.º, 2.º ou 3.º posto no campionato do mundo.
B2	920 €	<ul style="list-style-type: none"> ▪ Para deportistas: do 4.º posto en diante no campionato do mundo ou 1.º, 2.º ou 3.º posto no campionato de Europa.
B3	575 €	<ul style="list-style-type: none"> ▪ Para deportistas: do 4.º posto en diante no campionato de Europa ou 1.º, 2.º ou 3.º posto no campionato de España.

Normas que se deben ter en conta:

- Para que unha competición poida ser considerada como campionato do mundo, de Europa, de España ou de Galicia deberá tratarse dunha competición oficial, recoñecida pola federación deportiva correspondente, incluída no calendario oficial e destinada a outorgar o título de campioa ou campión do mundo, de Europa, de España ou de Galicia da modalidade, especialidade, proba ou categoría correspondente.



- No caso de copas, ligas, circuítos, series mundiais, series europeas, ránkings ou outras competicións compostas por varias probas ao longo da tempada, só poderá valorarse como resultado equivalente a campionato do mundo, de Europa, de España ou de Galicia o posto obtido na clasificación xeral ou final da competición, cando esta sexa a que determine oficialmente a condición de campioa ou campión, subcampioa ou subcampión, ou terceira clasificada ou terceiro clasificado do ámbito correspondente. O resultado obtido nunha proba individual integrada nunha destas competicións non terá, por si só, a consideración de campionato, aínda que a súa denominación inclúa referencias coma "Copa do Mundo", "World Cup", "Series Mundiais", "Copa de Europa" ou similares; nestes casos, poderá ser valorado como mérito deportivo obtido nunha competición de alto nivel, coa equivalencia que determine o servizo instrutor atendendo á súa oficialidade, ámbito territorial, relevancia federativa, nivel competitivo, sistema de acceso ou clasificación, número e nivel das persoas participantes e importancia da proba dentro do calendario da modalidade.
- Tamén poderán valorarse competicións internacionais ou nacionais que, aínda que non sexan as que se designan oficialmente como campionato do mundo, de Europa, de España ou de Galicia, estean incluídas nos calendarios oficiais e sexan recoñecidas como probas de alto nivel pola federación correspondente, pola súa relevancia deportiva, nivel competitivo, tradición, participación ou impacto na modalidade, coma o Tour de Francia ou a Vuelta a España. Nestes casos, o servizo instrutor analizará a competición e poderá propoñer motivadamente a súa equiparación a algún dos niveis de axuda previstos nestas bases ou, de non concorreren elementos suficientes, a súa non valoración.
- Excepcionalmente, poderán ser beneficiarias destas axudas as persoas que contén coa categoría de alto nivel da Deputación de Pontevedra e que concorran nalgunha das seguintes circunstancias de baixa:
 - Que tivesen unha baixa deportiva por unha lesión debidamente xustificada durante a maior parte da temporada 2025 e acadasen os resultados para acreditar o nivel deportivo (a lesión deberá ter unha duración mínima de 6 meses).
 - Que estivesen en período de xestación ou de baixa por nacemento no ano 2025 e acadasen os resultados para acreditar o nivel deportivo.



- En calquera dos casos anteriores, o resultado debe corresponderse cos 12 meses inmediatamente anteriores á baixa deportiva, maternal ou de xestación, e, en todo caso, será o servizo instrutor o que valide os feitos dependendo das características do deporte.
- O servizo instrutor poderá invalidar un campionato se o considera insuficiente; isto dependerá das características do deporte, de se existen fases previas, do número de participantes e doutras circunstancias.

Sexta. Lugar de presentación de solicitudes

As solicitudes presentaranse preferentemente por medios electrónicos a través do formulario normalizado dispoñible na Sede electrónica da Deputación de Pontevedra, <https://sede.depo.gal>.

Opcionalmente, as solicitudes tamén poderán presentarse presencialmente en calquera dos lugares e dos rexistros establecidos na normativa reguladora do procedemento administrativo común.

Unicamente se admitirá unha solicitude por solicitante. No caso de que unha mesma persoa puidese acceder ás axudas por máis dunha condición, modalidade, resultado ou categoría provincial, só poderá obter unha única axuda, sen que sexa posible a acumulación de importes.

Para a presentación das solicitudes, a Sede electrónica da Deputación de Pontevedra admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

Sétima. Prazo de presentación de solicitudes

O prazo de presentación de solicitudes será de vinte (20) días hábiles e comezará a partir do día seguinte ao da publicación da convocatoria e do seu extracto no *Boletín Oficial da Provincia de Pontevedra* (BOPPO) e na Base de Datos Nacional de Subvencións (BDNS).



Oitava. Comprobación de datos

Para a tramitación deste procedemento consultarase automaticamente os datos incluídos nos seguintes documentos elaborados polas administracións públicas:

- NIF das persoas solicitantes.
- Certificado de nacemento das persoas solicitantes.
- Certificación de residencia das persoas solicitantes.

Se as persoas interesadas se opuxesen ás devanditas consultas, deberán indicalo no cadro correspondente habilitado no formulario de inicio e achegar os documentos correspondentes.

No suposto de imposibilidade material de obter o documento, o órgano competente poderá requirirle á persoa interesada a súa presentación ou, no seu defecto, a acreditación por outros medios dos requisitos aos que se refire o documento antes de formular a proposta de resolución.

Novena. Documentación

As persoas interesadas deberán presentar, xunto coa solicitude, a seguinte documentación:

- Certificado deportivo (anexo I) emitido polas federacións no que se especifique o mellor resultado deportivo obtido no ano 2025.
- Libro de familia ou certificado electrónico do Rexistro civil correspondente (só para as e os deportistas DEPO_TALENTO menores de 14 anos que non teñan DNI/NIE).
- Certificado médico (só nos supostos recollidos no apartado de baixa, no que se especifiquen a duración desta e o motivo).
- Documento acreditativo de representación, en caso de que a solicitude non a presente a persoa solicitante.

A documentación complementaria presentarase preferiblemente por vía electrónica. As persoas interesadas responsabilizaranse da veracidade dos documentos que acheguen. Excepcionalmente, a Deputación de Pontevedra poderá requirir a presentación do documento orixinal para cotexalo coa copia electrónica presentada.



Décima. Trámites administrativos posteriores á presentación de solicitudes e emenda destas

Se a solicitude non reunise os datos esixidos na convocatoria ou calquera dos previstos no artigo 66 da LPACAP, requiriráselle á persoa interesada, de conformidade co establecido no artigo 68 desta lei, que, nun prazo de dez (10) días hábiles, emende as faltas ou presente os documentos preceptivos, e indicaráselle que, se non o fai, se entenderá que desiste da súa solicitude, que se arquivará sen máis trámites.

Todos os trámites administrativos que as persoas interesadas deban realizar durante a tramitación deste procedemento faranse por medios electrónicos a través do modelo "2887054 Trámites administrativos xenéricos distintos da solicitude", dispoñible en <https://sede.depo.gal>.

A Sede electrónica ten dispoñibles unha serie de modelos xenéricos que as persoas interesadas poden utilizar para realizar as xestións máis habituais durante a tramitación administrativa (representación, emenda da solicitude, alegacións, renuncia ou recursos, entre outros). Estes modelos son comúns para os distintos procedementos e poderán empregarse sempre que a normativa reguladora do procedemento concreto para o que se vaian empregar non estableza outros modelos específicos. Os modelos xenéricos poderán descargarse para anexalos a unha solicitude ou para realizar trámites sobre outros expedientes e presentalos de forma electrónica ou presencial, segundo a normativa reguladora do procedemento do que se trate. No formulario deberá indicarse, no seu caso, o procedemento para o cal se efectúa o trámite. Os modelos están dispoñibles en:

<https://sede.depo.gal/web/public/dynamic/catalogo/tramitesxenericos>

Décimo primeira. Notificacións

As notificacións de resolucións e actos administrativos practicaranse preferentemente por medios electrónicos. As persoas interesadas que non estean obrigadas a recibir notificacións electrónicas poderán decidir e comunicar en calquera momento que as notificacións sucesivas se practiquen ou deixen de practicar por medios electrónicos. A persoa interesada deberá manifestar expresamente a modalidade escollida para a notificación (electrónica ou en papel).



As notificacións realizaranse a través da Dirección Electrónica Habilitada única, accesible desde <https://sede.depo.gal> e a través de <https://dehu.redsara.es/>. Este sistema remitiralles ás persoas interesadas avisos da posta á disposición das notificacións á conta de correo que conste na solicitude. Estes avisos non terán, en ningún caso, efectos de notificación practicada e a súa falta non impedirá que esta se considere plenamente válida.

As notificacións por medios electrónicos entenderanse practicadas no momento en que se acceda ao seu contido. Se o envío da notificación electrónica non fose posible por problemas técnicos, a Deputación de Pontevedra realizaraa polos medios previstos na normativa reguladora do procedemento administrativo común.

Décimo segunda. Procedemento de concesión

O procedemento de concesión das axudas realizarase en réxime de concorrencia non competitiva, ao non resultar necesaria a comparación e prelación das solicitudes presentadas.

A concesión efectuarase mediante a comprobación do cumprimento dos requisitos establecidos nestas bases e a valoración do resultado deportivo acreditado pola persoa solicitante, que determinará o tipo de axuda, o importe correspondente e o recoñecemento da categoría provincial DEPO_DAN, DEPO_DAN+ ou DEPO_TALENTO que proceda.

En ningún caso a suma total das axudas concedidas poderá superar o crédito máximo dispoñible para esta convocatoria.

No caso de que o crédito dispoñible sexa insuficiente para outorgar o importe íntegro das axudas que correspondan conforme a estas bases, aplicarase un rateo entre as persoas beneficiarias ata cubrir o crédito dispoñible.

No caso contrario, se unha vez calculadas as axudas conforme aos tipos e importes previstos nestas bases non se esgotase o crédito dispoñible da convocatoria, o remanente poderá distribuírse entre as persoas beneficiarias mediante un incremento adicional da axuda inicialmente correspondente. Este incremento terá un carácter igual para todas as persoas beneficiarias, sen que, en ningún caso, a axuda individual poida incrementarse por enriba do 25 % da contía inicialmente asignada segundo o tipo de axuda que corresponda, nin superarse o crédito máximo dispoñible da convocatoria.



Décimo terceira. Instrución do procedemento

A instrución do procedemento de concesión de subvencións correspóndelle ao Servizo de Deportes e comprenderá as seguintes fases:

- Estudo e comprobación de todas as solicitudes polo servizo instrutor, que realizará de oficio todas as actuacións que estime necesarias para a determinación, o coñecemento e a comprobación dos datos.
- Informe-proposta do servizo instrutor da relación de solicitudes, tipo de axuda e a súa contía. Así mesmo, incluírase unha relación das solicitudes que non cumpran os requisitos establecidos e as razóns da súa desestimación.
- Fiscalización dos expedientes por parte de Intervención.
- Proposta de resolución provisional. O órgano instrutor, á vista do expediente e do informe-proposta, formulará unha proposta de resolución provisional debidamente motivada, que será notificada coa súa publicación na Sede electrónica da Deputación de Pontevedra; establecerase un período de dez (10) días naturais desde o mesmo día da súa publicación para presentar alegacións ou renunciar á axuda proposta.
- Informe-proposta sobre as alegacións ou renuncias.
- Proposta de resolución definitiva. Examinadas as alegacións e as posibles renuncias, no seu caso, formularase a proposta de resolución definitiva, que incluírá a persoa solicitante ou a relación de solicitantes para quen se propón a concesión da axuda, e a súa contía. Tamén recollerá as solicitudes rexeitadas e os motivos deste rexeitamento. As propostas de resolución provisional e definitiva non crean dereito ningún a favor da persoa beneficiaria proposta fronte á Administración mentres non se lle notifique a resolución de concesión.
- Informe de fiscalización de Intervención de todos os expedientes e da proposta de resolución definitiva.

Décimo cuarta. Resolución do procedemento

A proposta de resolución definitiva formulada polo órgano instrutor someterase á aprobación do órgano competente, que resolverá o procedemento.



O acto de resolución do procedemento publicarase no BOPPO e terá os efectos dunha notificación, segundo o establecido no artigo 45 da LPACAP.

Así mesmo, serán igualmente obxecto de publicidade a través da páxina web da Deputación de Pontevedra, www.depo.gal.

O prazo máximo para resolver e notificar a resolución do procedemento non poderá exceder os seis (6) meses, contados a partir do día seguinte a aquel no que finalice o prazo de presentación das solicitudes. O vencemento do prazo máximo sen notificar a resolución lexítima as persoas interesadas para entender como desestimada por silencio administrativo a solicitude de concesión da subvención.

Décimo quinta. Compatibilidade e incompatibilidade

Estas axudas serán compatibles con premios ou axudas económicas recibidas durante o ano 2026 procedentes de calquera outra Administración ou de entes públicos ou privados (galegos, estatais, da Unión Europea ou de organismos internacionais), coa única excepción daquelas axudas para deportistas concedidas por outras administracións provinciais, coas que serán incompatibles. En calquera caso, manterase a obriga de comunicarlle ao órgano concedente a súa obtención.

Décimo sexta. Pagamento

Unha vez notificadas as axudas concedidas, procederase ao pagamento da axuda ás persoas beneficiarias por transferencia bancaria.

As persoas beneficiarias deberán estar ao corrente das súas obrigas tributarias coa AEAT, coa ATRIGA, coa Seguridade Social e coa Deputación de Pontevedra.

No momento da concesión das axudas ás e aos deportistas, deberanse ter en conta as retencións do IRPF, se as houbese.



Décimo sétima. Obrigas das persoas beneficiarias

As persoas beneficiarias deberán cumprir coas obrigas da LSG. Concretamente, durante este exercicio e o seguinte deberán:

- Cumprir e aceptar todo o estipulado nestas bases.
- Participar e colaborar coa Deputación na promoción do deporte e da actividade física na provincia, se esta o requirise, co fin de demostrar o grao de aproveitamento destas axudas.
- Asistir á Gala do Deporte organizada pola Deputación de Pontevedra.
- Someterse ás actuacións de comprobación, así como a calquera outra que puidesen efectuar os órganos de control competentes, para o cal presentarán tanta información se lles requira no exercicio das actuacións correspondentes.

Décimo oitava. Transparencia e bo goberno

De conformidade co establecido na normativa de transparencia e bo goberno e no artigo 15 da LSG, a Deputación de Pontevedra publicará na súa páxina web a relación oficial de persoas beneficiarias e o importe das axudas concedidas. Incluirá igualmente as referidas axudas e as sancións que, como consecuencia delas, puidesen impoñerse nos correspondentes rexistros públicos, polo que a presentación da solicitude leva implícita a autorización para o tratamento necesario dos datos das persoas beneficiarias e a referida publicidade.

Décimo novena. Devolución e reintegro

As subvencións concedidas deberán devolverse ou reintegrarse nos seguintes casos:

- Por obtelas falseando as condicións requiridas.
- Por non aplicalas aos fins para os que se concederon.
- Por incumplir a persoa beneficiaria as obrigas asumidas e as condicións fixadas nestas bases.



Vixésima. Órgano de aprobación

De acordo co establecido na base 16.2 das Bases de execución do Orzamento para o ano 2026 e no artigo 18 da LXS, o órgano competente para aprobar estas bases é a Xunta de Goberno.

Vixésimo primeira. Dereito supletorio

Para o non disposto nestas bases contemplárase o establecido no artigo 4 da Ordenanza xeral de subvencións da Deputación de Pontevedra.

Vixésimo segunda. Publicidade da convocatoria

Estas bases reguladoras publicaranse no BOPPO e en <https://sede.depo.gal>.

Por outra banda, de conformidade co previsto nos artigos 17.3.b e 20.8.a da LXS, o texto da convocatoria remitiráselle á BDNS para a súa publicación nela, que será a que lle dea traslado do seu extracto ao BOPPO.

Vixésimo terceira. Protección de datos

Os datos persoais obtidos neste procedemento serán obxecto de tratamento por parte da Deputación de Pontevedra, en calidade de órgano responsable, coa finalidade de xestionalos, verificar os datos e os documentos que a persoa interesada declare na súa solicitude para comprobar a exactitude destes e levar a cabo todas as actuacións administrativas que, no seu caso, deriven.

A lexitimación para o tratamento dos datos baséase no cumprimento dunha tarefa de interese público ou no exercicio de poderes públicos segundo as normas de rango legal recollidas no apartado "Normativa aplicable", dispoñible na ficha de procedemento en <https://sede.depo.gal>.

Os datos persoais obtidos neste procedemento serán obxecto de comunicación ás administracións públicas no exercicio das súas propias competencias ou cando sexa necesario



para que a cidadanía poida acceder de forma integral á información relativa a unha materia e ao público xeral dada a publicación de actos prevista.

As persoas interesadas poderán acceder, rectificar e suprimir os seus datos, así como exercer outros dereitos ou revogar o consentimento segundo o previsto en <https://depo.gal/proteccionde-datos/exercicio-de-dereitos>.

